

四庫全書

集部

欽定四庫全書

集部

清容居士集卷

十至十二

詳校官庶吉士臣張溥

侍讀臣孫球覆勘

總校官降調編修臣倉聖脉

校對官編修臣勵守謙

謄錄監生臣蔣繼勲

欽定四庫全書

清容居士集卷十

元 袁桷 撰

律詩

七言

廉右丞園號為京城第一名花幾萬本右丞有

詩次韻

閉戶春深詩崇侵卷簾新燕掠清陰亭亭梅月能消酒  
肅肅松風獨和琴新筍未容穿石徑落花時許補雲林

主人妙手隨機轉萬本姚黃磨紫金

楔日與剛中待制至廉園閉門不納駐馬久之

復次韻

雲鏤亭臺煙霧侵難將楔迹擬山陰花飛竹外疑紅袖  
水度松間自玉琴駐馬客迴迷遠路倚闌人在隔清林  
誰言洞口無消息一見應須直萬金

送孫道士歸杭

送鴈南飛十五年朔風吹雪上華顛梨花的的疑蝴蝶

燕子深深似杜鵑東野先生愁外句西湖處士夢中緣  
抱琴獨去知無奈一棹春江水拍天

次韻王寅甫侍讀莅醮長春宮

飄飄笙鶴雨絲輕聽徹靈瑤曲再成玉案香分花有影  
瑤堦松暝露無聲九枝燈裏開真景三素雲中賀太平  
莫怪錦袍衣袖冷還家從此羨長生

蛻骨稜稜似鶴輕觚壇危處玉為成天街正候三能色  
雲所疑呼萬歲聲氣篆通靈歸廓落心章祈歲報清平

金穰上瑞吾皇意不用神芝朶朶生

題張宗魯編修詩集

鴈落峯寒晝飲冰碧雲為構玉為稜已除白髮三千丈  
疑上瑤臺第幾層松頂露涼旋整鶴原頭火淨撇游鷹  
何人妙解精新句別盡風簷一寸燈

送李伯英秀才歸廬陵

黑頭徒步謁神州  
藪藪飛塵鬢已秋  
日暮競傳鸚鵡賦  
天寒誰解驕驪裘  
鴈聲未歇砧聲續  
燈影初銷月影流

可是親知留不得故園清興起滄洲

次韻答周秀才

湛湛玄雲起研山桃花為色玉為顏  
溟鵬水擊三千里天馬風生十二閑  
芳草春醞堪試筆長空秋盡獨憑闌  
松堦翠影流如滴遲子攜書共往還

次韻成季灤陽見寄

客思如癡日似年晚年投幘思悠然  
看山不逐馬蹄去得句時從鴈足傳  
紅綠芰荷秋岸岸青黃蒲稗雨田田

葦蘆有興愁無奈欲問渾河下水船

次韻陳又新

登臺底用惜春霏平楚微茫落照時燒後斷碑遺鳥跡  
耕餘殘壁隱蠶眉泉分去路蕭蕭玉山聳歸雲簇簇旗  
駐馬應須更搔首遠煙迴鴈不勝詩

西湖空濛圖

舊隱湖山筆底收相從京洛意中游昏昏車馬飛花雨  
寂寂鐘魚落葉秋千古登臨翻作夢百年歌舞漾清愁



何當化鶴看滄海不用呼猿汲澗流

次韻張秋泉盆梅三首

萬里南來帶白雲低徊猶作自由身  
孤根齧雪疑無伴冷蕊餐霞別有春  
頗憶西湖頻入夢不煩東井與生神  
相看歲晚真清絕疑是瑤臺第一人

深明閣裏江南樹老鶴翹翎似病身  
紙屋藏雲團白雪丹臺朝日補青春  
蒼苔有恨悲山鬼翠袖無言倚洛神  
回首空林歸未得淒涼相對獨闌人

華頂空餘萬疊雲，獨將清影伴吟身。  
虬枝欲挾窻前月，驛信能通塞外春。  
底用施鉛鄰越女，從教翦水恣波神。  
碧虛僊客清無奈，留作新詩故惱人。

次韻仲章游南城二首

瑤閣雲深野馬昏，分明日月引天門。  
峰迴九瑣疑無路，水過三義別有村。  
頗怪鶯花春不負，却嫌雞黍約誰存。  
山童閉戶茶煙暝，客至從渠未許論。

側身千仞苦不早，愛此春從天際浮。  
北雪西山憐我瘦，

黃塵白日送君游  
翩翩目送雲中鴈  
杳杳機忘海上鷗  
今古登臨總陳迹  
倚闌何事起清愁

贈王君佐

精神映日碧芙蓉  
直節昂昂衆不如  
十載長安心似水  
一官淮海食無魚  
少年已擬治安策  
晚歲肯為封禪書  
聞道功名須皓首  
鐵冠簪髮莫嫌疎

送蕭立道歸天台

華頂雲寒人不  
到煩君為上最高層  
天雞正叫三更日

海鶴曾餐六月冰  
客路微茫同脫木  
鄉情依約近歸僧  
還家莫作採芝叟  
背負青天傲大鵬

送李景山使交趾

萬里雲南把一麾  
日南重見使車馳  
思家不作玉門表  
得句擬題銅柱碑  
象譯舊傳周禮樂  
馬人遺俗漢威儀  
枕榔溪驛疑飛雪  
樹樹梅花九月時

九日書懷

烏帽衝塵鬢漸皤  
黃花慵插獨婆娑  
新霜去鴈天機少

落日歸雲雨意多  
拄笏看山真我事  
持螯把酒為君歌  
登臺欲盡鄉關望  
一徑松陰長薜蘿

慰曾道士

積構層巔聳玉臺  
松花浮翠雪皚皚  
終然一笑騎鯨去  
可是長眠化蝶來  
身外乾坤憐納芥  
壺中日月隘浮盃  
何人欲問先天事  
隱几蒼髯喚不迴

抵滄州先簡善之應奉

黃金臺上英賢滿  
白玉堂中步武新  
愧我青塵暗顏色

羨君碧眼映精神春風未信看花少  
午夜應知視草頻  
北望五雲開曉霽相思那得勝相親

送李彥謙赴西臺御史

百二山河驄馬游西風渭水思悠悠  
鶴翻古栢千年雪  
鶻擊平蕪九月秋拄笏漢陵尋玉鴈  
解鞍蜀道問金牛  
官曹朱墨何時了一榻清吟是勝流

張虛靖園菴扁曰歸鶴次韻

招僊游館構亭亭萬疊松寒晴日青  
玉局講殘春換劫

石臺丹在草通靈紅羊赤馬悲滄海白虎蒼龍儼大庭  
為愛子喬笙鶴美月涼時許夜深聽

送華道士赴武當山

神君壽與玉皇同歲歲香傳第一峰龍虎使來紅日擁  
龜蛇靈在碧苔封萬年松子天風奏九節蒲根澗底春  
博士文工成故事石牀為採玉芙蓉

送虞伯生降香還蜀省墓

玉雪祠官貂帽低笑乘飛燕上天梯寶幙繡重團金粟

鈿合香嚴印紫泥官饌每供千歲鹿驛程深聽五更雞  
流沙可是河源地搖首揚鞭更欲西

丞相墳前雙闕摧泉聲隱隱栢崔嵬金牛已向秦中去  
銅馬空傳渭上來叢竹雨留銀燭淚落花風颺楮前灰  
百年華表塵千劫聞道曾孫始一回

再次韻

振衣千仞笑雲低捫歷星辰復劍梯度坂政須三尺筵  
入關應笑一丸泥神君祭重祠青馬墨客才工頌碧雞



萬里遨頭端不負花開緩醉玉東西

閣道新平舊石摧望鄉使客意鬼鬼犀牛坐見降王去  
杜宇聲隨望帝來三卯錄成蒐有燐五丁神泣劫揚灰  
椎醜欲作鄉鄰會揮手先催弩矢回

三次韻

觸石危藤壓路低哀猿送客上丹梯一百八盤雲亦雨  
二十四番花似泥解珮浮游憐野馬振衣亭育聽天雞  
拾遺已去武侯遠空戀祠堂與瀼西

時平弔古莫心摧去驛斜陽指馬嵬曲曲松陰隨帽轉  
層層山影入杯來草玄有意池留墨觀象無心筇畫灰  
為問丈人今在否金牛穿嶺日千回

送王繼學修撰馬伯庸應奉分院上都二首

玉京高處雪流脂連插雞翹綠鬢垂蹠蹠有泥歌獨漉  
琵琶無夢說相思黑河舊樂催填譜白海名花擬進詞  
羽獵上林俱罷賦卿雲何以報明時

淺坡平疊磧漫漫拂嶺青帘卷畫看氍毹屋起營羊腍熟

土房催頓馬通乾桐宮走驛傳金碗冰正分奩貯玉盤  
莫上鄉臺望南北白雲微處是槍竿

寄王儀伯太守

維揚太守文章伯故疊荒烟取次題逆浪風高淮白上  
寒沙雲落海青低極知后土花如雪不惜平山醉侶泥  
跋馬使君官驛畔揚鞭却在夕陽西

壽劉承旨

茲審齡開希有文潤太平玉杖造朝樂堯堦之化

日銖衣拂石歌舜殿之薰風壽擁靈椿歡傳故梓  
敢陳善頌庸贊令辰

稜稜鶴髮暎方瞳玉帶桓圭一品崇禁署清名行世久  
高門盛德與天通升堂衣並老萊子做國詩傳衛武公  
共道榴花宜結實綠陰濃淡駐杯中

孟習卿都事母八十歸省關中其家四世科第  
祖十五當金亡時舉進士終待制

鶴髮初開九九年東西雙鳳集庭前

乃兄官燉煌亦歸壽母

篋藏

龍榜金花淡案捧鸞書  
鈿軸鮮竹筍清甘宜夕饌  
萱花芳遠傲春妍  
風流文物關中舊  
點檢諸孫射策編

送李元章宰陝縣

稅冕觚壇匹馬歸  
冥鴻斜日悟天機  
明時法律心常鄙  
小邑絃歌願豈違  
潁水初霜黃葉下  
華山新雨碧空飛  
當今人物須公等  
行見鋒車入帝畿

次韻李伯宗苦熱

庭院無眠夜氣深  
繁星閃閃夜沉沉  
祝融炊火翻初劫

姑射凝冰易舊心  
角枕雲蒸紋欲斷  
蠟燈煙暖淚難禁  
蕭騷忽作還家夢  
翠木扶疎萬竹森

次韻程士安睡鶴

疏翎慵受朔風侵  
谷口雲歸自在心  
蝶化不知人事改  
蟻酣空憶世塵深  
珠宮胎息天濤靜  
寶所神游斗柄沉  
何事驚鳥繞林樹  
月殘衝曉議晴陰

次韻陳海陰

三月雪花飛作氎  
春風似欲駐新年  
夢當好處成烏有

歌到狂時近自然村樹綠齊黃鳥界海山青盡白鷗天  
何人會得龐公意布領長披不上船

次韻院長退朝書懷兼送李元章廟令三首

踐阼篇陳夙致齋明良慶會叶榮懷南山豹聳文章潤  
嶰谷凰鳴律呂諧黃閣規模深倚注金鑾人物費推排  
夜光照坐羣傾動誰道驪龍左耳乖

朝迴深坐碧雲齋無限家林入素懷整頓乾坤新禹貢  
翦裁冰雪舊齊諧觚稜望日紅蓮擁蹠躩看山玉筍排

魚水政親那棄得白鷗相對莫相乖

曾著蟬冠會宿齋陽春玉雪映澄懷黑頭瑞世須奇遇

白眼論文自寡諧騷衷當偕身獨障

有乘馬入廟門者叱出之

含桃

薦廟手親排蕭蕭匹馬投山縣人事相催似好乖

### 題鰕齋

蒙蒙眇眇傲滄溟羞殺任公夢未醒寄館蠅鬚猶綺靡  
深藏黍粒獨清寧掌中旋舞憐飛燕案上能行笑巨靈  
惆悵九衢長劍客駢肩堂下慕遺腥



送東平程太守

泰嶽巖巖鄆水清  
分符投老得安榮  
百年禮樂維時舉  
比屋衣冠合早評  
馬鬣舊封蒼檜老  
龍鱗古殿綠蕪平  
高唐路近羊生泣  
東望憑公為寫情

送周南翁分刺池陽

柳亭松露十分甜  
秋浦天青鴈拂簷  
黃葉滿庭君吏隱  
白頭掩卷我郎潛  
風催帆影迷紅蓼  
江送歌聲入畫簾  
惆悵九華金碧洞  
謫僊人遠月纖纖

次韻雙頭菊三首

袖舞西風大小垂  
駢頭顚立傲霜姿  
步搖高擁車同入  
笑靨初鈿坐共移  
素質斷金疑並蒂  
閒情餐玉喜浮眉  
蓮池睡冷鴛鴦起  
似怨秋聲有恨離

碧雲低壓玉繩垂  
鸞鵠交翔表異姿  
白帝司秋金已肅  
黃人捧日馭初移  
藥宮罷講扶雙髻  
桂館霜餘却十眉  
剽掃雕搜兒女態  
象中明兩見黃離

空庭雲盡露珠垂  
翠羽交分大雅姿  
氣服中黃心獨苦

光浮大白眼爭移智瓊有約徒誇額京兆多情却畫眉  
桃李爭妍真不遜故留雙玉伴支離

閣皂山青玉軒晦菴容齋諸賢觴詠之地虞伯  
生作記吳成季令賦詩

江南琳館蕭閒地一一新文付集賢真誥總傳天外語  
禁經未數酒中僊步虛巖近琅玕響禮斗壇空薜荔緣  
諸老會文題詠絕誰將鳳觜續離弦

題揭曼碩詩卷

深湛妙思筆鋒收的的冥鴻楚岸秋直以紫芝招綺夏  
擬將白羽定曹劉松濤夜漲驚金谷花雨春濃爛錦洲  
此意徊徨人未識期君翫月上南樓

送衛大隱回錢塘

衛清叔  
曾孫

諤諤中丞骨已仙滄洲漁火起寒煙魏公賜宅猶傳笏  
元子磨崖可賣錢夜雨鼠鬚編素業春風麈尾話行年  
西湖雲鎖梅花凍休浪狂歌酌酒船

送華道士住宗陽宮

黑髮祠官佩水蒼萬松深處對虛皇  
黃柑有法能爲酒  
紫木無飢可當糧  
招鶴舞空山月冷  
檄龍吹雨海天涼  
瑤池欲問長生事  
汲澗研朱寫綠章

翦刀草

手截溪流護翠苗  
層陰淡蕩碧雲嬌  
秋風玉殿釵留股  
晴日朱筵舞折腰  
眉缺可能分燕尾  
頂荒猶解插雞翹  
翻思往歲南方厄  
羣采空陂恨未銷

鳧茈一名翦刀一名燕尾爾雅乃是

也南方饑  
歲採食

馬伯庸擬李商隱無題次韻四首

金縷歌殘月滿江  
玉顏曾憶侍油幢  
象牀雲重恩專壹  
鯨錦波翻賜疊雙  
春淺正宜氈作幕  
夜涼深恨魀為窻  
浣紗可是無靈匹  
側足寒溪濺石淙

翠簾匝匝護朱光  
千葉宮桃滿院香  
閨苑有鸞通尺素  
靈橋無鵲寄流黃  
上林賦罷歸巴蜀  
興慶詞工謫夜郎  
不是月中親度曲  
世人那解聽霓裳

相期心似石城潮  
日望晴虹結彩橋  
却月眉愁歌漸遠

凌波步近意非遙  
抽琴有恨迴清角  
疊袖無塵轉綠腰  
弄玉最憐隨鳳去  
秋來誰與伴吹簫

白髮詞臣兩耳垂  
華諛堆笏陋牛醫  
宮娥引燭催麻日  
院吏傳更寫制時  
蠟撚化生秋夕  
賜翠標疊勝歲華移  
低頭欲說唐朝舊  
願侍虛皇進玉卮

送浦如淵辭官南歸

厭聽朝雞擁被吟  
吳船水滑碧千尋  
平洲種橘清霜重  
小墅栽花綠霧深  
瞿鵲真能談孟浪  
鸕夷端自愛浮湛

因君搖蕩還家思燭影秋房恨不禁

送李公敏薊州之官

幼著儒冠佩楚蘭文章元不給飢寒風前野馬停盃却  
天際真鴻挂笏看作計政須千樹栗養生那用九還丹  
偏州事簡登臨足花下題詩更倚闌

劉婦表門

王中丞妹

空林露下菊無馨玉雪深闌養暮齡河水泛舟雲耿耿  
湘潭鼓瑟雨冥冥夜燈孤鴈鳴何切古鏡離鸞舞已停



歲晚不須多感慨雙楹高亞柳枝青

永新闕氏義門

銀髮稜稜鶴骨尊舊傳庭誥付諸孫要同公藝書芸館  
還擬自倫標楔門春酒緩歌常棣雅夜燈深候鵲鵲原  
他年欲向廬陵客詢是瀧岡第幾村

送柳唐佐出守懷孟

甬道塵深曉倦趨河山環抱暫分符花開屬縣詩頻賦  
竹暗名園酒易酤積雪翠峰通小有祥雲朱印接虛無

寇恂可是專河內入覲應須馬疾驅

次韻大亨待制賦院中御馬纓花

華林清切謝塵纒坐閱朱英不下堂九就當胸猩血淺  
六騶飛翮鴈行長擎天力重朝承露向日心專夜斂香  
清陰政須容小草肯同羣卉鬪妍芳

賦文子方簣簣亭竹影五首

簣簣亭裏畫天然穠淡疎明筆有玄水底青蘋羞宛轉  
月中丹桂妬嬋娟錯刀側布難為贈鈎鎖橫陳不受填

午夜碧窻人獨坐分明清派出丹淵

文與可號  
丹淵集

鎖窻午色墨花鎔側側低低隔面濃日映黃離金瑣碎  
雲開白賁玉瓏鬆蕭疎忽印青禽獨旖旎疑分翠羽重  
二子定知忘食色高齋今喜見遺蹤

霧縠禪衣絢翠裳倚風蕭瑟轉琳琅縱橫直欲攻堅白  
濃淡渾疑榻硬黃劍氣低昂動天地神光離合幻陰陽  
陶生久矣知形累歲晚沉冥託贈章

形贈  
影

玄覽功深萬化遺一窻光透白差差梳風櫛雨呈千手

却月橫雲鬪十眉形蛻已忘身有累神交應許我相知  
暗中摸索誰消得阮籍途窮眼未眇

朔吹南塵久避招閉門白醉獨逍遙玉淵龍起鬚騰擲  
銀箔蠶登繭動搖露井珠輝湘女淚雲屏翠暈沈郎腰  
象中直欲窺參伍肯學紛紛个字嬌

畫竹家  
忌个字

栗氏玩芳亭

納納羣芳入小亭嵐光霧彩思沉冥飛花成列粘碁局  
高樹參前列畫屏鶴避晚烟茶半熟鶯啼午日酒初醒

春風可是饒紅紫一片蒼痕眼倍青

送牟景陽信州監征二首

風帽霜鞍絳闕邊晚隨陽鴈度新年  
榻前諫笏家猶寶  
架上經箱客總傳  
世事不知蒼狗變  
機心端與白鷗眠  
冰天車碾淮南路  
痛嚼梅花一惘然

上饒山簇水精屏江左諸賢冢樹零鬼谷橋  
寒松化珀  
仙巖土暖草通靈丹鉛有法供烹煮  
筍蕨無租給使令  
盡道中年多作惡  
相看鬢影各星星

送巨德新四川省郎中

金鑾清密簿曹稀拄笏看雲數鴈飛蜀省地尊卿月重  
漢江家近使星歸草堂舊詠迷陳迹石室殘經卧落暉  
戰壘已從芳草換未妨晴雨眺摩圍

退食公庭日未西浣溪清雨換障泥籌邊舊式傳銅馬  
弔古新詩問石犀荔子綠陰鸚鵡過杏花紅影秭歸啼  
遨頭雅集須頻領不惜郢筒取次攜

送樂德敬甘肅儒學提舉二首

磅礴坤輿總帝圖  
手提文印化沮渠  
旋宮更問涼州譜  
尚右時通梵國書  
枸杞夜號端入驛  
蒲萄秋落易盈車  
飛沙斜日頻回首  
歸鴈相迎亦惘如

月支城下泉如酒  
祁連山前雪似花  
虎頭萬里飛驛堠  
蝶夢五更驚塞笳  
范老籌邊心磊嵬  
李王堅壁骨槎牙  
白頭太史欲歸去  
時立東城數暮鴉

示從子瑛

聞子欲通靈寶秘  
天台洞客眼深青  
弄丸底問月消丙

服食那能老復丁  
隔竹引龜心有想  
按圖索驥術難靈  
吾衰端有先天易  
不用山中採茯苓

送玉笥山聶道士

五月凌風龜殼船  
梁山深滌白鷗鮮  
神清似飲金莖露  
病已何須玉井蓮  
墨閣小春刊畫錄  
碧窻新月補瓊篇  
相親每憶相忘處  
北望歸鴻倍惘然

人日立春子昂承旨賦詩次韻

鳳歷調元二節并  
泥牛華勝得相迎  
翦花欲擬丹心巧



縷絲深憐白髮生  
日轉扶桑瀛海曙  
陽迴析木歲華明  
登高可是無芳思  
歸鴈南來倍客情

帝京節物喜相并  
挾日晴暄淑景迎  
鳳輦雲開人共仰

烏輪海轉子初生

是夜庚正立春  
明日甲子

岸容梅柳風光動  
澤腹

魚龍水氣明  
誰惜玉堂春晝永  
汗青無補若為情

書懷寄從子瑛二首

越公舊築鄞江宅  
風捲飛花劫火新  
子竟尋真餐白石  
我方作史玩青春  
金張螭綬本欺世  
王謝烏衣亦可人

誓墓政須堅晚歲雙峰擁髻碧嶙峋

當年羣從玉參差炙轂談天不數奇翦葉舞空山鬼泣  
唱籌量日厯人疑深春柳下爭飛騎小雨花前鬪奕碁  
我最少年惟閉戶篝燈煮藥學題詩

送李仲因雲南憲使

鋒車春倚少城邊上冢還家思惘然就日雲低天尺五  
圖南路近里三千相如作使文如綺諸葛籌邊筆似椽  
自是蓬壺舊仙客望瀛新曲鴈飛傳

送馮士啓淮東憲司幕長

遠涉江湖奉板輿，離亭柳色易枝梧。  
英標共擬崑山玉，符采堪鄰甌社珠。  
土竈煙高濕黃葦，沙溝水淺漲青蒲。  
煩君敏手須晷月，天際回朝認烏鳬。

送李仁父歸高安

枝藤雙屐玩青春，廿載登臨筆有神。  
東海競傳垂釣客，南山曾恥上書人。  
觥凌水滑千帆直，禁火煙消萬柳新。  
從此閉門聞見絕，高齋顏樂養天真。

送王繼學御史分司汴省

松階並對影參差君竟乘驄佐聖時  
每恨同情不同調  
可堪相送復相思  
楚山春夢行雲識  
汴水秋聲落葉知  
我老江湖盍歸去  
少留定刷錦囊詩

院長有子在外從許州募得之院中率賦詩

袞繡門楣五色新  
明珠還浦竟相親  
月中顧兔分傳的  
天上麒麟抱送真  
僊李蟠根元指姓  
露桃食實始知春  
青箱萬卷能傳業  
佇看他年演世綸

題東平張善父野堂

泰嶽當軒積翠環野堂高築稱身間深春藤榼花溪醉  
小雨芒鞋藥市還九老尋盟歌窈窕諸孫勸壽舞斑斕  
客來欲說人間事松滿疎簾月滿關

贈姑蘇陳生

絲東昌遇大水買舟  
渡避水者二千得官

清秋水落渺無津河伯登林竈有鱗用力定知非一日  
論功何止活千人放龜晚歲川如掌渡蟻當年筆有神  
堪笑乘輿溱洧者孤舟空艤竟推輪

送鄭景尹游麗水

冰雪長身映漆瞳  
峯嶺深處珮青葱  
碧窗讀易猿啼樹  
石洞題詩鶴舞空  
強項政須消世慮  
折腰元不為身窮  
玉堂倚馬須英俊  
佇看鵬程振祖風

次韻院長新製安車

禁路縈迂雪護沙  
老來丞相許乘車  
向推紅日頭如葆  
今看青天眼未花  
馬識輪聲嘶外廐  
鶴追轍迹過仙家  
似聞相杵新堤曲  
歷落催朝扈翠華

送張道士降香龍虎山

天香歲歲下名山雪浦春融作使還  
鶴引老樵渾碧眼燕迎舊主的朱顏  
雲浮玉佩身疑舉霧結層樓手可攀  
暇日須回侍郎宅好題修竹聽潺潺

饒州張侍  
制之族孫

寄貫酸齋侍讀

解珮瀟湘已廣騷因風更望子胥濤  
身輕舊食青精飯思遠新貽金錯刀  
紅蓼秋清堪數鴈黃橙霜熟且持螯  
龜趺林立嚴題品得意那無一字褒

次韻蓬萊暢師

西山秋冷雪皚皚駐馬頻聽出塞歌短艇水生歸鴈急  
故園春盡落花多登山見月雲光淡坐石臨溪樹影  
海上故人機事息詩來勸我老漁蓑

次韻天童岫禪師

太白峰高積翠明老禪的的寄深情相思沙磔惟懷璉  
獨立鄉臺近子卿舊業久荒松露立浮名空眩槿朝榮  
定須結社修真隱寒月深燈了梵經



吳門賴上人年甚少訪余田舍且惠詩次韻

草舍苔深徑已荒  
何人著履試初霜  
飲冰喝石精神聳  
煮茗跑泉齒頰香  
愧我歲窮驚浪走  
愛君年盛鄙清狂  
古松流水平生願  
後會蒲團共燭光

冀寧徐母表閭

月落孤幃霜滿墀  
篝燈深護襖中兒  
肯為別鵠相思操  
得見慈烏返哺詞  
槐柳拂雲森宅里  
芝蘭擁砌映門楣  
高堂訂坐雙眸炯  
時說初年涕決頤

清客居士集卷十

欽定四庫全書

清容居士集卷十一

元 袁楠 撰

律詩 七言

過揚州憶昔六首

令威化鶴千年返  
列子御風旬日遊  
已信銷沉同此意  
莫將寂歷起清愁  
江流今古空陳迹  
山色有無知幾秋  
赫赫當年成底事  
斜陽明滅隱滄洲

漢東之國古隨州一老昂藏死即休黑髮虎頭真骨相  
青春鷹尾鬪風流人言謝傳為朝鎮誰信鍾儀作楚囚  
浩蕩乾坤納今古好將汗簡寫千秋

空遺蒸壤白如銀不見當年指畫因高視漢庭無出右  
清談洛學竟成真極知羽扇為癡具更恨烏衣是偶人  
六合車書端有意百年荊棘已生春

蕭蕭凍雨濕旌旄猶著殷紅舊戰袍金盃昔聞歸馬埽  
牙牌誰肯信龍韜樓頭換箭鼓聲急堂上傳盃歌韻高

到底姦雄有真態木綿菴畔鬼車號

連檣米艦接江湄鞭撻東南力已疲  
虛籍漸成藩鎮侈  
辟書時被廟堂移清風號野黃蘆淨  
亂雨傳更畫角悲  
從此甲兵端不用書生有味老清時

四城賦擬張衡麗十鑑書同賈誼哀

公有四城賦  
江東十鑑

腹裏

春秋納雲夢案頭今古起風雷青衫不受折腰辱

舊尉  
慈溪

為郡守厲  
文翁勅去白眼豈知徒步回

乙亥間  
道歸里

舟泊城南更回首

寒風吹淚下天台

此詩屬胡  
懷寧三省

觀物

黃河不信從天下濟水那知有伏流自古乾坤合神化  
空將簡牘費冥摻張華博物身終死鄒衍談天舌竟休  
我亦從今銷綺語春風碧眼玩沙鷗

客中端午簡善之

海城紅憶石榴新海子空看芍藥春節物侶憐游客  
風埃終媿醒吟人已無蒲酒澆清恨那用蘭湯浣素塵  
健羨南方鄧供奉團圞坐笑歌頻

再次韻

尚憶山城節序新，榴花疑是十分春。  
田園處處祠蠶祖，浙間以端午祠蠶，定絲價。門戶家家插艾人。  
可怪詩書成白眼，却從

車馬識紅塵。思家那侶攜家樂，尊酒招邀莫厭頻。

次韻酬王參議

槐陰散髮亭亭午，花影持盃拍拍春。  
佳節擬酬懷古意，清風不礙笑雲人。  
光陰滿眼消黃妳，世事忘言煮綠塵。  
相望江湖知已久，相親杖屨莫嫌頻。

玉堂合歡花初開鄭潜昭率同院賦詩次韻

一樹高花冠玉堂知時舒卷欲雲翔馬嘶不動游纓聳  
雉尾初開翠扇張舊渴未須餐玉屑嘉名端合紀青裳  
雲牕霧冷文書靜留取餘清散遠香

崔豹古今注青裳一名合歡今但名

合歡而青裳之名不著

笑壓春菲綠滿堂翩翩清暑獨高翔錦雞朝日輕霞吐  
彩鳳舒雲密翠張中散舍傍銷綠綺婕妤扇底泣黃裳  
芭蕉可是無情思一展隨風不解香



風流一老笑烘堂解佩看花欲共翔夜露未晞歸翼飲  
朝陽初旭怒髯張霧牕不用青綾被天闕誰縫綠縹裳  
朱槿黃葵效開歛爭妍那得有清香

次韻鄭應奉苦雨

漏天有術那能補息壤無功不願豐漠漠雲陰來委羽  
昏昏水氣接垂虹吳門水舊尤甚車塵已逐油泥黑龍火渾疑  
野燒紅萬里乘除同此意相看咄咄且書空

觀閑閑齋紅梅次蘇公姿字韻四首

莫恨飛瓊花信遲相看冰雪已芳時  
藥珠霞補春風面  
萼綠雲開旭日姿骨相未須嫌火色精神真欲傲冰肌  
何人瀟洒紅綾裏巧暈輕煤畫折枝

臘底飛靈瑞已遲天將絳雪報清時  
施朱可是良工手  
補袞端歸大雅姿溜溜溫泉傳賜浴  
斑斑辱井愧淪肌  
閉門已覺寒如許迴首江南竹外枝

雲閣香溫睡覺遲不堪殘角曉鐘時  
玉妃瓊屑難為從  
青女鉛華敢弄姿可怪鮫綃能幻色  
誰將猩血解填肌

團團侶就迴文錦薄暮凝愁上翠枝

筆底冰清落句遲花神已報艷陽時疎明不作顛狂夢  
嫵媚猶存諫諍姿酒力衝寒端著臉枕痕破曉欲侵肌  
道人不愛人間色乞取初開第一枝

壽善之

二月柳青春滿枝十分蕉葉不須辭黑頭政謝赤松子  
碧眼故憐黃口兒玉井蟾蜍吞暗浪錦袍蛺蝶舞游絲  
雲牕松牕文書靜蚤晚行修野外儀

次韻仲章遊長春

積翠中天下土昏坡陀深處轉金門松間不遇採芝客  
雲裏空憐打麥村華表鶴歸城已換滄洲人去柳空存  
高堂靈骨疑金鑠應許重游得細論

八極端能合寸眸丹梯危盡覺身浮手持玉笛誰為贈  
背負青天我獨游山影西來疑駐馬浮雲南去侶輕鷗  
人間底用重回首極樂無愁果有愁

次韻仲章舟中思南湖

綠陰凝處彩毫揮  
忽憶春殘理棹歸  
約略晚花圍錦幄  
招邀雅筍試斑衣  
長年客影如雲度  
五月湖光似雪飛  
從此清林供笑傲  
莫看迴雁損天機

再次韻

到手清觴不用揮  
滿川帆影逐風歸  
花前自憶堂前竹  
道上重看身上衣  
虛牝鳴秋通澗急  
伏雌驚曉隔林飛  
還家絕勝從遊樂  
只恐雲牕趣斷機

倦客慵將塵尾揮  
倚蓬日日聽催歸  
澄波自映烏紗帽

小雨深憐白紵衣  
花徑春殘人獨立  
松林雲冷鶴孤飛  
相思此地今如許  
萬里重迴且息機

次韻仲章過彭城

山影涵青簇簇來  
周遭城角漸低徊  
梁分曲直雙龍下  
水合縱橫萬馬回  
鑄冶已銷游子劍  
登樓誰負謫仙才  
淒涼正字寒如許  
萬疊蒼雲鎖翠苔

仲章詩律大進數日  
道中論詩亦頗相合  
復次前韻以勉之

氣摩屈賈欲平揮格律論詩要有歸石髓定成千歲乳  
藕絲空綴五銖衣寒原草盡蒼鷹搜涼月松陰白鶴飛  
從此天河窮已近還家何用詫支機

仲章詩律已入唐人風調而下語猶未馴妥殆  
類禪人過橋斷橋之意近世學者類有此失仲  
章德業遠大當不若是此殆其弄翰也次韻

落落懸河巧發揮盤渦洄洑竟東歸苦心欲寄千年澗  
妙語誰傳半夜衣野馬功名甘却走雕蟲翰墨愧橫飛

多言要是平生累瞪目相忘杜德機

玉色橫陳羽扇揮江湖邂逅侶忘歸終憐古調難為瑟  
誰信天香不染衣汀草弄妍成背怨山雞照影惜分飛  
鮫人雨夜珠成滴清曉知裁第幾機

平生俗客手中揮愛子清新欲倦歸北闕正鳴蒼玉佩  
南湖空製芰荷衣麒麟瑞世非關走雕鶚呈空不為飛  
薄宦政須成吏隱莫將奔逐墮危機

舟中將次淮南行復叙別而仲章歸程可還家



作端午次韻述情

曾憶登舟送客揮艱難何事獨南歸楚鄉水暖沈菰黍  
江國雲深潤葛衣坡筍綠迎馴鹿過海榴紅駐小鶯飛  
笑言已極誰為語絕倒無顏侶陸機

中秋次韻貴白

桂子香飄露濕巾廣寒疑使月為賓流螢不受十分采  
過雁真成一點塵吹徹梅花天外使飲殘竹葉夢中身  
靈河自有乘槎便擬轉神山閱爛銀

寄王參議

輞川新樹綠勾勾睡起慵軒岸葛巾穿石養魚迴小隱  
盈缸釀秫補長春宵歲醫國三年艾天與傳家一角麟  
蒼狗白雲今已定不應談笑卷經綸

玉堂文杏合歡枝共說仙翁賦有詩日暮團團空翡翠  
雨寒點點自燕脂塗鴉舊詔追遺事揮麈清談補雅詞  
千古襟期誰與共相親那得勝相思

泊文家口望瓠山僅一舍復寄

天平水濶雁參差下有高人坐不移  
懸榻應知延孺子  
汎舟無奈侶  
嶽之晴雲滿塢開  
新畫落月穿梁想令姿  
眼底憐才誰復近  
裏糧端擬話心期

次韻應德茂寒食見懷

寒食光陰君莫游  
亂花羞別古枝頭  
山家蠶浴雨穿屋  
海步魚腥浪蹴舟  
楊柳飛時疑是老  
杜鵑啼處不緣愁  
詩來未盡相思意  
刁斗寒清月過樓

次韻史猷父春游夜歸

留取餘春伴白頭落花如雪翠如流提壺不用頻沽酒  
垂柳偏能獨繫舟過雨月開雲母障隔湖燈映水晶毬  
還家已覺衣裳冷遙聽鐘聲是竹洲

戲贈黃仲正

好花不受丹青鑄碧眼難將白黑分萬里宛駒出龍種  
十年野鶴異雞羣知卿未盡才難數酌我無多酒易醺  
午夜池塘有新夢好將色筆寫春雲

再用韻答仲正

愛子十年燈火勤，相看不惜錦機分。  
飛花映水空憐色，去雁出雲終念羣。  
一寸春暉生遠思，五更清夢了殘醺。  
詩來陡覺秋濤袞，海嶼青飛片片雲。

泊彭城復懷黃樓

黃樓高下復誰識，白塔短長應得知。  
萬里風煙歸傑作，百年雨露起深思。  
文章自昔為時忌，翰墨于今作世師。  
從此江湖掩篷去，碧雲斜日數游絲。

泗水

泗水青於古蔚藍因依碧藻淨相涵游魚細數心空羨  
活火新烹舌自甘可怪然犀望牛渚底煩斬虎觸蛟潭  
清湍混混歸滄海不惜臨流浣舊衫

歌風臺

長安蘊醢恣猖狂頭白翻思守四方不悟宮中由呂氏  
却憂身後有吳王老翁後嗣真癡弱遊子故鄉空慨慷  
千古英雄多此意荒臺清淺水微茫

清明

水落渾黃風晦冥不知節物是清明道旁新塚悲歡盡  
柳下長亭聚散輕門靜鞦韆歸燕逐沙寒簷簷過魚鷺  
河南禁酒河陽飲醉醒相看總有情

宜遠樓

紫翠光中擁翠鬟分明倒影落西山遊塵自逐鐘聲去  
過雨能將月色還萬里關河新勝槩一天星斗舊躋攀  
絕憐想像空題詠後會應須共倚闌

李學士畫壁初成席上分韻得毫字

春樹纖穠隱碧桃  
秋山磊落湧銀濤  
天邊雨露歸青障  
物外煙霞入素毫  
有客支筇臨水徑  
何人解珮憶蘭皋  
滄洲景物供題詠  
詠准擬淋漓奪錦袍

次韻危公遠道士

驪塘族孫與予為年家

筆勢翩翩千丈坡  
一天清遠佩飛霞  
金莖欲採珠宮露  
鐵箭能敲玉壁砂  
人物滄洲憐我輩  
冰霜喬木擅君家  
百年此意知誰會  
相視無言眼倍花

閉門積雪擁平坡  
誰把餘醺散綺霞  
掛瀑解裁天外練



熬波竟化海中砂  
機心著物那成語  
句眼論詩合到家  
從此相親更相望  
不妨渴墨醉成花

再次韻

家世清聲起諫坡  
江湖邂逅忽披霞  
新姿正侶三眠柳  
妙語能為九轉砂  
杯寫黃封來禁道  
牕留白醉近仙家  
慙慙懸榻何時下  
準擬寒空詠雪花

朱顏冰雪映瑤坡  
清曉朝陽漱碧霞  
神目豈堪容玉屑  
聖胎端可化金砂  
碧桃有實誰為種  
玄鶴無心莫問家

可怪春風滿詞筆硯池頻與滌冰花

游城南次韻陳玉峯

市橋水斷綠交加簇騎隄尋處士家坐聽蟲聲行木葉  
卧看雲影落簷花清晨采露筠籠重薄暮沾春烏帽斜  
一徑寒英端手種好烹晴綠代煎茶

送真定任生

東髮從戎天外萍還家何事說飄零花前秉燭頭疑黑  
馬上看書眼倍青倚劍獨憐今古月吹笳時憶短長亭

故人烏府頻相問一笑惟尋雙玉瓶

次韻史允叟殘菊

白雁西風幾夕陽故園牢落是他鄉獨憐壽客三秋晚  
不受玄神一夜霜曉沐緩垂雙玉珮晚粧愁帶紫羅囊  
凝香深院誰消得時許飛瓊點額黃

次韻元復初簡危公遠

客舍光陰幾驛亭天邊白日轉重溟擬將竹葉留春住  
共慰杏花隨雨零鶯入上林貪翠萼鶴旋華頂傲青冥

十年道舊元文學為笑無心侶水萍

蔡逢原編修婦翁壽八十

堂堂經學古儒風三世相傳八十翁  
靈壽杖扶雲雨屐延年水飲月雙瞳  
閒逢好客猶花下倦憶前朝侶夢中  
問社從今誇盛集重行彩袖舞杯空

次韻陳無我題石窗故居

煙雨歸來別有春文頤曾作笑雲人  
還家未信三千里拂石今看第幾塵  
往事黃梁方就枕多情白髮竟沾巾

故園未覺秋容淡，留取孤香次第新。

夜別俞生

半秋歸夢常繚繞，三十六雷煙樹重。

所居山名台人謂山高處為雷

別祇看今夜月無眠，更聽五更鐘青帘出市橋邊路。白雁連天海上峰，聞道還家有新樂，不妨雲榻臥高春。

次韻正旦會朝

閭闔春迴旭日鮮，花光搖曳珮僊僊。金蓮漏下催初刻，玉筍班齊祝萬年。香擁袞龍開黼座，風迴笙鶴舞鈞天。

朝元法曲誰傳得歸醉蓬萊話日邊

送山人還江南

白雁南來愛朔風掉頭我亦一枝筇  
澄江去浪疑奔馬古澗歸雲侶伏龍  
釣石水移黃葉滿丹爐煙冷碧苔封  
從今不說人間事更上岵嵒第幾重

次韻田師孟詠牡丹

積翠瑤京玉作層笑餐承露議誰勝  
腰寬侶稱黃金重心巧終憐刻楮能  
蜀客錦機流水浣茅僊丹鼎彩雲騰

道人香色都忘却月落空闌始一凭

交枝風動碧層層揮手芳塵謝不勝解帶暮雲真韻勝  
歛襟午日是驕能取青婉白憐雕鏤抱紫迴黃合變騰  
宮錦競傳新拾得沉香停檻喚誰凭

紫府淵淵十二層濃春如酒力初勝苦心侶怨鮫綃薄  
敏手難誇羯鼓能雨立無言慙委靡地行何術可超騰  
雲窗烏几誰消得時許飛瓊月下凭

次韻師孟西曹即事兼簡子貞儀曹二首

時議  
定律

令

盛世昭明復古初掃除弊事獨溫舒牛毛置令心徒褊  
鳥跡遺文體本疎齊相避堂憐獄市鄭人鑄鼎泣刑書  
畫簾一度薰風曲欲寫琴心愧不如

蕭疎門巷落花初楊柳陰中指望舒辨拙莫窮三耳妄  
塵深坐見二毛疎覆蕉得鹿非真夢點筆成蠅豈誤書  
慷慨聽君人物論雕蟲我亦陋相如

次韻贈我眉侯道士築宮江陵



白苧藤冠自在身，獨看潭影認清真。  
還丹已化千年雪，玩易重尋太古春。  
楚觀江流通白帝，蜀山雲氣接青神。  
冥鴻南北疑無跡，萬里乘風問世人。

次韻陳貴白中秋見懷

玉人海上振衣來，一曲清商鐵笛裁。  
碎露晶熒疑水立，橫雲缺落侶山頽。  
郊君端有鎔銀術，西帝慚無斫桂才。  
往歲相思江北路，夜闌曾上望鄉臺。

次韻鄭景尹詠梅十首

笑壓羣芳雪霽吟點粧詞筆補春林衝風曳白疑含笑  
映日抽黃轉苦心鐵石橫陳羣羽避水霜獨立二毛深  
阿戎故是調羹種可為閒情淚滿襟

醉倚孤根散髮吟他年鼎鼎出園林黃鬚雅相非凡種  
白面清談豈素心湖月歌殘銀燭冷湘雲弄罷玉龍深  
疎明可是無春思角曉霜清整翠襟

幽人為愛水邊吟雪滿疎籬月滿林魂冷不知莊叟化  
神清難撓楚王心寒蜂戀蜜須猶綴霜螭含漿色轉深

千古湘纍詎無意廣騷從此酹靈襟

手提色筆朗飛吟雲佩衝寒入寶林雅操獨高淹海角  
微陽初動識天心鏤冰嘗巧機猶淺切玉疑神用始深  
回首羣芳半麤俗倚風三嗅為開襟

回首白頭悲故吟清愁萬疊起雲林東君密注非無意  
北客相逢訝有心絳闕雲低珠藥迸碧潭風定玉徽深  
色香要是人間世更上凌虛始散襟

萬里相逢得放吟醉揩雙目傲瓊林龍沙慘澹明妃怨

漁笛淒清處士心  
餐玉侶嫌玄圃冷  
笑雲應喜翠微深  
何人更作江南句  
翻使兒曹競挽襟

欲看南雪倚簷吟  
點檢春風第一林  
天與陽和誰借力  
晚持精白轉虛心  
冰蠶半蛻眉猶濕  
凍蠟初銷淚漸深  
夜半花神應有語  
覆觴從此斷袞襟

梳風帶雨為渠吟  
揮手唐昌陋鶴林  
壯髮初生齊映額  
童顏已就靜齋心  
野蠶成繭輪囷富  
玉兔抽毫刻畫深  
莫遣風姨強攘袂  
故教月姊與聯襟

十分深酌十分吟  
烏帽支筇故繞林  
月下無言疑背面  
水邊獨立伴傷心  
珠成蠟鳳王郎巧  
笙徹青鸞帝子深  
歲晚自知誰與伴  
風篁搖影互交襟

參殘霜急尚孤吟  
恍恍神游古蹕林  
四皓局殘惟一色  
三郎鼓罷了無心  
珠游鐵網青琅潤  
苔補虬枝壞衲深  
擬把鸞膠固青蒂  
未須殘雪墮衣襟

贈潘山人

夢中得前二句因續之

布韞青鞋今已矣  
看山舊眼碧深深  
空憐石馬駐荒塚

不見金魚飛翠岑  
地鏡有書穿石乳  
土圭何術候天心  
行年七十足稱老  
牛臥前坡為指尋

次韻景尹酴醿二首

光陰風雨短長亭  
花到春餘倍有情  
翠蔓倚松超直幹  
錦江綠酒錫嘉名  
虬蛟纏影青雲聳  
么鳳啼芳新雨輕  
白面郎君休翦綵  
好將椽筆賦西京

不將名字博西涼  
留取餘春在一觴  
當辰珠衣迎面立  
曲房寶靨捧心裝  
碧雲一色行明月  
翠幄千層護夕陽

揮手朱殷空爛熳敢將清思寄幽凰

可久齋二首

虛室心源百尺澄深深龜息養空清一川鷗鷺古儀表  
四海弟兄真性情璧玉誰人傳至樸鏞鐘何處問希聲  
芒鞋直訪茗溪上雪透梅枝鬪月明

三十六宮春不老何人月窟重推陳亭亭倚蓋浮空碧  
匝匝空輪颺素塵郢客詞工端自苦海翁機息可相親  
支頤擬問庖犧易笑指靈著侶有神

送長洲江都史

官曹無事日提壺一榻深明晝倚梧  
稻蠓水低歌拍拍  
蓴鱸秋冷夢蘧蘧長年簿領慚錐子  
晚歲生涯羨木奴  
千里布帆歸思好雁聲伊軋起菰蒲

昌上人游京師欲言禪林弊事甫入國門若使  
之去者昌余里人幼歲留吳東郡遺老及潁秀  
自異者多處其地以余所識聞若承天了天平  
恩穹隆林開元茂皆可依止遂各一詩以問訊



虎丘永從游尤久聞其謝世末為一章以悼

人說江湖少舊僧懸崖深掛一枝藤採苓欲取千年魄  
擊石曾烹六月冰天上星辰端歷歷曾中樓閣自層層  
相逢只說前朝事知是松源第四燈

青鞋高掛天平壁指點雲門三兩峰禪榻已容黃葉覆  
詩瓢從把碧苔封曉風殘月千村櫓細雨疎煙隔水春  
我向京塵疑老盡吳山清淺越山濃

獨木山寮不出門一瓶一鉢送朝昏巖迷鳥跡千崖泣

松吼龍吟萬壑奔掩息端如雞抱子愛閒屢見竹生孫  
海門月落寒潮急準擬乘槎與共論

玉几峰頭第一枝老禪吃吃我深知曾將鐵杵敲水骨  
侶怪鉛刀割密脾法外無心猶涉解句中有眼即成疑  
袈裟不展蒲團穩此是開元妙總持

我識虎丘三十年精神霄漢鵬張拳機當危處即燒印  
語到盡時難續絃路涉兩歧空有泣溪流一滴竟無傳  
雙峰古樹蒼藤罨時有子規啼徹天

手調千歲廣寒藥，擬補月輪蟾已飛。  
眼見昔人歸逝水，心憐志士惜殘暉。  
孤花苦別生香樹，急雪深憐壞色衣。  
為愛同鄉復同客，絕慙同調不同歸。

山人歸去意何如，八尺方牀自卷舒。  
側岸採茶敲石火，隔峰翦竹溜清渠。  
碧潭印月菱花鏡，白雁橫空貝葉書。  
後日相尋定何處，不於吳下即康廬。

次韻王繼學

蕭蕭寒雀下庭除，一榻蘆蔭是我居。  
雪後看山雙眼淨，

風前攬鏡二毛疎退之掌制慙存藁

退之四十八歲知制誥一年僅存崔

羣戶部一制余年相同亦草一制

伯玉知非定止車深愧年華增老大

還家早注故山書

除夜雪

黃雲黯淡夜如何晚勢參差更馭娑著地不隨人跡亂  
舞空偏入麥苗多鴉驚列炬穿珠樹馬趁初朝映玉珂  
歲律詎隨人事改故將嚴冷轉陽和

元日朝迴

積素稜層厚載坤天雖三唱日初暎千官山立歸文石  
六衛嵩呼徹禁門花帽舞風喧法曲椒觴承露湛皇恩  
新年欲奉瑤池對願借扶搖與化鯤

萬國梯航滿禁衢卉裳象譯語音殊鳳簫聲送纖腰舞  
雉扇行分兩翼趨花氣欲浮金鑿落雲光疑下錦流蘇  
詞臣不識金泥秘指點薇垣頌六符

偶術末章答繼學

承明三入並時流俯仰深慙此地游誰謂東南無美箭

極知西北有高樓  
韋編舊學陰陽秘  
汗簡功深歲月修  
三史如山詩思少  
那能走馬過長楸

金鑒深處是家壇  
玉雪青春不負賢  
會見鳳毛能掌制  
定知麟角可膠絃  
浮榮芻狗寧居後  
曲學雕蟲敢避先  
慙愧南州徐孺子  
每看塵榻屢潜然

雪後

畫角初消已弄晴  
曉看突兀眼偏明  
寒牕駐景成虛白  
凍樹裁春點素瓊  
北戶埋藏疑有跡  
南枝搖曳若為情

憑君欲問飛靈巧水自白雲山自橫

送李署丞歸許下

春風得意故還鄉月白霜清傍晚裝  
燕領定承新鳳詔馬蹄猶戀舊鵷行  
溪邊父老欣相過燈下兒童訝已長  
我亦辭家今一載青天歸雁攪離腸

清容居士集卷十一



欽定四庫全書

清容居士集卷十二

元 袁桷 撰

律詩 七言

送喻道士歸蜀

舊與內相李公為布衣交

鶴骨輕輕碧眼鮮  
五千言裏契重玄  
定知德裕曾傳道  
久與長源共學仙  
金籙夜調丹井汞  
紫衣春染御爐煙  
掉頭不說人間事  
指點白雲尋醉眠

趙郡睦孝子真逸堂

青松手植已成雲盡日庵廬不出門  
屋角慈烏議晴雨  
階前馴鹿候晨昏  
清秋釀黍修鄉約  
深夜篝燈課魯論  
明世詎堪成隱癖  
舉頭東帛起丘園

五老堂

鬢眉雪色古儀容  
五老雍雍氣象同  
菊水定知延上壽  
桃源今解識高風  
弟兄黃卷傳儒素  
娣姒青燈教女紅  
慣說前朝征戰事  
醉拖筇竹數歸鴻

送河中段惟德應奉除西臺御史

千年青簡正紛如，還著鐵冠歸故居。  
妙筆醉欺紅芍藥，丰姿解映玉芙蕖。  
過家上塚爭驚喜，拄笏看山任卷舒。  
試上樂遊原上望，綠陰芳草正扶疎。

韓參議家慶圖

叔祖暨父  
各九十

丹泉為醴菊為蘊，的的顰眉似畫圖。  
萬石齒高勤澣洗，二疏年並得歡娛。  
兵前父老難尋伴，眼底孫曾總業儒。  
欲向碧桃花下醉，斑衣紫綬兩相扶。

吳成季父母壽八十

延陵季子古高賢雲耳于今壽種傳有道定知真有子  
齊眉更喜復齊年蒼龍雙擁宮醪湛白鶴重歸丹井鮮  
自是君家多孝感玉杯甘露會羣仙

吳猛事父母至孝  
後有玉杯甘露之

感

白雲平章致仕

曉看明鏡欲休休萬里功名陋虎頭絳闕直辭黃蘗貴  
白雲終伴赤松遊侍臣傳醴真殊遇退傅揮金得自由

盛代東封催告禮更須元老侍垂旒

寄題成都李御史萬竹亭

亭亭萬竹封侯貴聞說西洲植此人風送笙竽聯雅奏  
月留鸞鵲寫清真山頭密護千年雪地脉潛行八月春  
舊譜言竹鞭  
八月西行欲上岷峩探游事煩君指點浣花津

送鄧君用教授歸廣信山

光陰那俟日懸車拋却荷衣即故吾置對直如朱伯厚  
退休還侶邵堯夫白鷗遠水清秋鏡紅葉前峯落照圖

者舊即今同逝水早將鴻筆為傳模

以謝疊山  
黨下獄

壽李承旨二首

兩曜迎陽合璧時  
郊君乘瑞佐昌期  
閣中像有功臣贊  
圮上書為帝者師  
碧眼閒人如水鑑  
丹心許國有天知  
歲周甲子今重轉  
消息梅花第一枝

清時得意恣逍遙  
雪色鬚眉兩鬢饒  
棋局春風深閉戶  
酒樽涼月獨吹簫  
豹韜袖手終傳采  
鳩杖無心強造朝  
門外種松今百尺  
他年為我掛山瓢

安西老人

方瞳如漆耳輪高喜見曾孫守碧桃  
鳩杖月明尋枸杞  
鳳簫春暖醉蒲萄  
故天上方蟬冕  
老子山中但豹韜  
欲問汝南耆舊事  
且乘龜殼把雙螯

早朝興聖宮次韻

萬馬東西甬路斜  
銀河初曙起宮鴉  
天香隨輦凝三素  
風絮沾袍點六花  
銅史漏浮催卓午  
玉奴聲轉進流霞  
詞臣點綴瑤池事  
底用秋風海上槎

次韻周南翁退朝三首

蹕道聲迴覲后皇霞旌雙引拂朱光  
龜臺新按霓裳曲獸鼎重然甲煎香  
歌板過雲穿泱泱酒車流水度汪洋  
重輪瑞世思齊聖傳信應須屬子長

雉尾高張擁玉皇彤庭金榜粲明光  
舞階飛絮傳滕六執衛傳臚轉阿香  
珠帽蕭聲雙窈窕翠旌雲影互方洋  
侍臣誰近前螭立願紀堯年化日長

蛾眉班立肅皇皇恰匝松陰陋午光  
舞翻當軒初進酒



表函登陞促傳香六龍捧御雲中日三象輸琛嶺外洋  
欲識兩宮清淨理薰風殿閣漏初長

和游岡子原韻

棠花淡淡柳花濃岡子原頭立晚風三月雨聲人共喜  
一樽春色我難同麒麟臥草青山外騷褭穿雲綠樹中  
晚歲滄江情不盡想看清淺數鳬翁

用早朝韻酬伯生試院見懷

玉署松深月半斜研朱和露勘塗鴉射熊心苦穿楊葉

吐鳳聲清飽竹花過眼侶迷三里霧騰身誰上九層霞  
故人掉首南山去應釣秋風漢水槎

酬周南翁子二首

小榻燈殘雁影斜詩成重點墨如鴉  
臯禽警露呈三疊  
天馬追風剪五花郢客有才歌白雪  
湘纍無計佩飛霞  
璿源自是天邊路不用贏糧學泛槎

碧箋長短鬬車斜玉雪青春髻侶鴉  
博物已知窮海棗  
苦心端欲鏤冰花山中伐木鳴搏黍  
馬上看塵起落霞

健美雲窗無限好  
慈烏雅雅鵲槎槎

送儒醫何大方歸信州

雙櫓鷺鳴野水高  
天風落葉響林臯  
空堂桂露流金乳  
舊鼎鉛霜長玉膏  
丹府久虛存夜氣  
上池新飲察秋毫  
山中猿鶴驚相問  
肯為緇塵染素袍

次韻周南翁拜孔林二首

陵廟陰森佳氣蟠  
湯湯洙泗接淵源  
硯傳昔日王官得  
履憶當年漢庫存  
手板文裁楷舊植  
髮冠香守檜殘根

唐文皇以孔林楷木裁手板賜十八學士鄉中張羣經參政家猶存金七檜焚士大夫劇檜根為韜髮冠

日月行天地萬古韋紳沐聖恩

山簇平林野水清整冠下馬得徐行壇空尚憶風雩樂  
宅近惟聞金石聲環珮齊趨文有度豆籩初秩禮為程  
百年雨露同車軌郡國千官奠帛生

贈豫章蔡叡歸里

以鄉舉不  
中來京師

抵掌彈冠謝未能立談白壁且擔簦厭聽長衢三尺雨  
愁飲深冬半片冰冠蓋情傾年運往簡編心苦歲華增

去來聞見冥鴻迹岸幘雲峰撫大鵬

次韻院長題趙崇德修撰玉簪集

誦君家世倚樓句不侶玉簪留詠深鳳髓獨傳天外寶  
裏蹄端出水中金停盃蘸甲難陪和對鏡搔頭敢擬尋  
可是因花攪情思相君題品的知音

送朱本初住玉隆萬壽宮

聲華文采動公卿忽綰烏條出帝城  
眯目簿書空汗漫飛空樓閣正崢嶸  
浮雲變態西山盡往事灰心北斗驚

肯作蕉池談笑住瑤壇笙鶴夜深清

寄城南友人

三入承明願已酬蓬瀛又復接清流  
碧牋時寫飛花恨寶瑟曾傳細雨愁  
夢繞故園追過雁眼穿鄉樹認歸舟  
荼蘼落盡啼鵲急慚愧羣公得縱游

寄史允叟

故國王孫佩碧蘭春雲涼月倚朱欄  
玉簫曲趁鶯聲轉金鼎香隨蝶夢殘  
碧汀波清堪把釣黃塵風急倦彈冠

外家文采唯君在笑我氷髭跨曉鞍

寄陳文卿

窗對平湖柳對門隔林鐘磬送昏昕  
水煎菊本傳家舊  
酷壓桃花勸客醺擬向蠻溪誇矍鑠  
爭如月窟養絢緼  
通家欲說先賢事兩岸書燈點點分

寄蔣遠靜

金紫家羶五百年城南喬木儼蒼然  
久知華屋慚卿長  
肯向深盃品聖賢  
虛白夜窗刊墨譜  
硬黃氷硯補瓊篇

年開六袞未云老桂斧重修月定圓

寄鄭景尹

太傅東山臥白雲經羸勤拾付諸孫玉堂舊制毫芒見

黃閣深功百一存

舊見中興玉堂稟  
唯傳位詔一篇

金盃宅深春雨暗

烏衣巷靜夜潮喧佳花奇竹勤題品莫學儒酸老瓦盆

寄開元恩禪師

恩公遁跡閭門寺欲下繩牀謝不能露滴花光珠五采  
月涵江影塔千層石榴紅帽明如火海艾青壇冷侶冰



俛首西山人物論獨聽孤雁對殘燈

寄本中峰

大目峰前萬石蹲坐看晴晝白雲昏山河有象百神泣  
鐘磬無聲兩足尊古澗老猿啼子母荒林野葛斷兒孫  
空王法藏誰傳得不展袈裟不出門

題郝伯常雁足詩

深羈孤館鬢毛斑猛虎搖鬚障海寰玉樹已歌歸逝水  
羽書難射隔平山不須羝乳終回漢肯學雞鳴詐度關

一寸蠟丸憑雁寄明年春盡竟生還

乙亥四月放還

霜落風高恣所如歸期回首是春初上林天子援弓繳窮海累臣有帛書中統十五年九月一日放雁獲者勿殺國信大使郝經書于真州忠勇軍營新館

中統十五年乃至元十一年明年奉使還

### 送王景先赴燕南僉事

一疏朝天罷柄臣河南井邑萬花新  
繡衣暫著明銀漢青鎖初辭戀紫宸  
朝膳平反娛壽母露困直指活飢民  
清時經濟須公等佇見鋒車入覲頻

小院四月十二日牡丹始開乃單臺花也余將

上開平作詩示瑾

暖風吹雨佐花開送我灤陽第四回內苑賜曾傳側帶

舊賞花宴有大側帶小側帶

江南畫不數重臺

徐熙牡丹無重瓣者至崇嗣始有之重臺

婢

之下者

迴黃抱紫傳真訣嬈白抽青陋小才自是

妖紅居第一他年折桂莫驚猜

韓魏公牡丹詩自慙折桂輸先手羞殺妖紅作

狀元魏公第三王堯臣第一

初夏即事

斜暉庭院樹陰移翠蔓交加靜對宜幸有花王能引酒

慙無草聖助題詩雁隨雲影還鄉近燕惜春光築壘遲  
尊滿東湖嘗不得笑看羊酪寫相思

壽椿堂

為王正臣作

嘉樹婆娑十畝勻笑扶靈壽日千巡風迴空籟笙竽轉  
雪壓長柯鐵石新欲從六龍遮赫日佇看五鳳舞長春  
銖衣拂石方成劫侶笑莊生說未真

送湖廣萬戶

壯歲軒騰碧海鯤英姿玉立暎朝暎昔司魚鑰曾通籍

今佩麟符暫偃藩渚對紅蓮便羽扇岸臨朱橘傲清尊  
郢宮疑在平蕪際為淪蘭陽些楚魂

次韻宋誠夫二首

風雨寒簷雞報晨書聲盡歲徹比鄰食貧不作三千客  
射策端為第一人吳郡壯游追子美楚宮陳迹酹春申  
少年覽歷真奇絕侶勝宣尼厄在陳

蹇驢入局走寅晨落月相隨擬結鄰鴻蹟鉅編侔古帝  
虬髯英貌想天人亥書深恐經三寫乙令何妨著五申

明世經綸須國士他年宣室願前陳

高內宰母漁陽郡夫人李氏表門

高門槐柳綠陰勻鶴髮浮光飮坐新  
繡出人間金孔雀  
孕成天上玉麒麟萱花北戶丹心炯  
竹葉初筵素臉真  
曾向瑤池侍清讌碧桃傳種六千春

壽劉彥良宣慰母夫人九十五

英英壽母步蹁躑疑是瑤臺墮地仙  
眼見九朝全盛事  
身經三世有餘年百壺傳賜黃封濕  
束帛加恩繡段鮮

指點斑衣聽訓語清忠報國紹家瓊

送湛師校經回杭

寒峰雲聳翠霏凝  
斲著青鞋侍帝庭  
貝葉頻刊塵几淨  
天花新墜寶臺馨  
雨翻荷露閒鷗立  
風攪松濤睡鶴醒  
絕世樞機真止水  
從今掩息畫堂扃

送雪竇長老校經回里

翠鎖松關疊疊高  
坐看明月負金鰲  
已將禪板傳心印  
暫下繩牀披毳袍  
聖諦無聲機獨露  
經筵有誤目難逃

塵中白髮誰消得歸掩山寮聽雪濤

送董教授之淮南主簿

為上都教授多善績

五月寒深冰滿鬚碧天雲冷竟何如聽駝度磧心彌折  
隨雁還家計未疎禮殿競傳周籩籩論堂新整魯詩書  
明年又作淮南客蘆荻叢深看捕魚

寄上都子貞伯庸繼學三學士

侍臣親切見銀河不用虛無八月槎蟬報早秋歸木末  
龍拖殘雪度山阿琵琶雲冷相思切蹀躞泥深獨立多



今歲同行詩壘壯飛觥擊鉢正橫戈

遠客三年親友簡絕獨開元鄰僧以書茗相寄  
廿載神京汗漫游玉堂深處得無愁隨龍北上迷三伏  
送雁南歸憶九秋親友共嫌疎問信律師屢約勸歸休  
南湖日出西湖月應許明年共泛舟

進史明仁殿書事

大帝仁功徧八寰敢將鉛筆強修刪寶輿花覆簫聲起  
黃道松分佩影環仗簇金吾開雉尾香浮黼座仰龍顏

還家陡覺詞臣貴獨恨年深鬢已斑

寄開元奎律師

雙塔亭亭透夕陽芭蕉深處碧窗涼江神夜聽光明偈  
天女朝分解脫香齋鉢午空烏守樹經臺雲冷鶴歸房  
平生欲結西方社侶怪淵明作吏忙

伯庸開平書事次韻七首

沉沉校殿內門西曲宴名王舞馬低桂蠹除煩來五嶺  
冰蠶却暑貢三齊金甌醅重凝花露翠釜膏浮透杏泥

最愛禁城千樹柳歸鴉揀盡不曾棲

尚方新製玉東西一曲笙歌舞袖低閨苑春濃中角濕  
巫山雲冷帽簷齊前行按曲停檀板內值催宣印紫泥  
可是年深慵應詔道人自愛碧山棲

身如病鶴倦梳翎往事猶存舊汗青伏日賜冰來上苑  
晚風傳竹度疎櫺承恩裁詔心抽繭落筆誅姦眼拔釘  
惆悵當今人物論披衣危坐望晨星

客子光陰疾箭翎徘徊玉署愧紆青當階翠影翻紅藥

連瑣回紋認綠櫺賦擬卿雲羞軋茁文追班馬黜灰釘  
北門英彥珪璋重朝論詮量比秤星

的的新愁漲碧波可堪跋馬上危坡明知風伯秋當路  
更候天孫夜度河沙磧共傳歌敕勒陰山那復見延陀  
周廷王會須椽筆慙愧陳人奈老何

馬足曾窮五色河更將舌本品浮槎新聲促軫傳三疊  
寶構懸鈴鎮四阿短榻雁來愁不奈小窗人去酌母多  
白頭慵作東封頌願效諸生賦止戈

侍臣底用賦明河西海曾看貫月槎向矣伏蒲移塞外  
終然加璧耀山阿羨君一鶴孤難並愧我雙鳬數侶多  
舊讀韜鈴工七縱裏瘡從此願投戈

送梅叔章官東流簿

江水東流八百里縣市南遷五十家寒蘆捲風散晴雪  
野燐照川成暮霞眼看平楚堪舉酒睡足高春方打衙  
都官之孫詩有種玉板日給飛龍蛇

次韻景尹觀菊

輪郭團團漢五銖身輕疑食碧雲腴翠蕤建纛凝煙紫  
金粟搔頭露迸珠日出正宜催玉立清霜即使作銀鋪  
城南兄弟空相憶插盡黃花更插莢

託根不復辨殊方朶朶參差列雁行映日巧心端補袞  
迎霜生面侶含香飛英獨佩疑湘浦笑靨初鈿陋壽陽  
惆悵千林正寥落故將清冷鬪秋光

送杜輝卿還蜀

浣沙溪上水粼粼化治能為五色春奇錦鶯穿金婀娜

粉箋花印玉精神百年文物毛錐舊萬里車書馬足新  
仁壽堂前乾鵲喜綵衣歌舞動比鄰

送石上人還江西

圓帽方袍入帝都秋風惘惘意何如雪飛北口蘆花絮  
雁落南空貝葉書聞見迴忘雙舴艋行藏無住一蘆條  
南泉安衆千五百從此跣趺滅太虛

送李巖夫四川譯史

玉雪精神映彩霞清秋馳坂忽還家心聲珠貫通三象

目力機深洞五貳青簡世傳端合繼黑頭早貴實堪誇  
子雲猶有江邊宅好續方言振國華

紀生書經罷歸還里

烏帽襦鞋四十程壯懷鵬翼決南溟定須金匱題銀管  
不羨鴻都寫石經落葉行階疑急霰流螢穿樹侶疎星  
白頭病客思歸切欲別無言酒易醒

示皇甫生

矻矻窮年皇甫生眼瞳如漆映書明神清古鑑金莖露



佩雜寒英玉井璜  
暘谷久知螢燭陋  
丹山深愛鳳雛清  
玉堂老叟端歸去  
龍榜蜚聲遲子成

再送紀生

荆國書臺有紀生  
眼穿紙背倍分明  
聲音雜比昭華琯  
跬步周旋夏后璜  
賦律意深慚篆刻  
詞華情近忌輕清  
老來贈語多謬誤  
歲晚相期玉汝成

鄉友南歸客舍淒然再次韻

雙槳迴波沒復生  
人隨帆影去邊明  
愁雲亂疊敷重席

寒月初絃掛半璜  
漁泊汶橋煙樹暝  
賈團淮浦海潮清  
方牀獨坐愁無著  
萬籟笙竽奏九成

睡覺東西書燈猶明喜勉元達兼示瑾子

兩家聞見參臺閣  
諸老論思聳廟堂  
莫畏大名辭繼紹  
願起凡子脫輕揚  
文章正始師先漢  
格律黃初謝晚唐  
師友淵源端有緒  
老夫推枕起論量

省中議事回元達有詩次韻

烏帽黃塵久帝城  
紫薇深處得陪行  
擬將直筆酬延閣

欲抱遺經進邇英老去病多傳桂酒秋來情重憶蓴羹  
蕭蕭易水聲悲壯不盡襟期白髮生

馬伯庸以詩餽免次韻

閉門滕六散銀星對坐罌罍白玉屏琴匣冷光棲綠綺  
壁騰寒燄起青萍凍雲縹緲迷圓嶠小酌無何入大庭  
知我年來雙眼眊特分明視了殘經

十一月十四日駕至京師楊仲禮有詩次韻

金輿清蹕發龍城乾雪坡陀甬道晴師起晉陽戈盡倒

令傳代邸轡徐行鸞皇合奏雲光遏龍虎交章曙色明  
欲認雞翹新法從駝車深處聽鈴聲

題馬氏先塋記後

曹子貞求作自  
崇寧傳至今

衣冠異代却灰平眼見佳城歷變更曲水護田成委佩  
纖峰當戶侶疑兵玉蠶零落威王塚石馬縱橫晁氏塋  
盛德獨傳三百載好將遺事述新銘

甲子立春

泰定元年新甲子天門上聖啓瑤圖日融凍樹青煙簇

土圻晴疏碧雪鋪五鳳彩樓催羯鼓雙龍絳闕勘魚符  
侍臣廿載題春帖從此歸休拾澗蒲

瑾次韻復成為隱居計

京塵二紀榻籬籓近喜家兒報宅圖移石近堂雲亂擁  
栽梅當徑蘚重鋪留春定合箋花譜品水應須置竹符  
鼎鼎南山看積雪青青古澗玩新蒲

病中玩易復次韻

丙寅老人五十九猶是先天第二圖桃竹杖輕藤杖換

蘆花絮冷柳花鋪  
當陽山立隨義御  
後夜尸居奪晉符  
已識羲皇真太極  
不須黃獨與蒼蒲

三次韻

濟勝閒身倩給扶  
家林應許畫為圖  
空巖有象飛泉舞  
古徑無蹤落葉鋪  
壯歲思僊尋火記  
暮年制氣習陰符  
松花一匕能消得  
猶憶南州筍及蒲

武氏母八十

玄髮離離聳黑鷗  
桑田滄海事如麻  
魚穿冰腹宜供饌

泉躍江心可煮茶烏繞楔門爭玉樹鶯開錦語印金花  
閒居欲效潘郎賦準擬家園置小車

安山曉泊

兩袖飛仙舞玉龍曉來朝嶽日華東門當楊柳灣灣碧  
水貼芙蓉岸岸紅隔艇茶香知楚客連罾魚熟總吳儂  
白頭已忘干戈事不用乘軒問土風

發御河

一棹黃流去復回飛沙積岸雪皚皚梨花亂逐沙鷗起

燕子深隨野馬來，晚歲官情初岸幘。  
暮雲鄉思獨停盃，茶蘼滿架留春住。  
知我將歸為緩開。

次韻砥平石

金門吏隱愧相如，歲月逡巡翰墨疎。  
挂笏有時看白雁，濯纓無復戀金魚。  
倦游築室成真隱，作意還山了舊書。  
更與老禪深結社，平生黑業總消除。

次韻謝定水

禪板蒲團振祖風，故將妙語起衰翁。  
青瑣舊學慙多缺。



玉佩清朝愧罔功，直以簡編窺往聖。  
敢將翰墨擬宗工，壯年永感辭庭訓。  
晚歲何由繼五公。

次韻昌國宗聖上人

海上秋潮候月生，島中瑤草不知名。  
每思大士超禪觀，獨恨秦王苦望瀛。  
龍吐戒珠殘照影，雁橫梵宇故鄉情。  
妙年碧眼才翻錦，為念衰翁強入城。

贈徐秀才還里

西風擁騎出前郊，紅葉玲瓏透遠坳。  
家近不須傳雁帛。

縣間曾是用牛刀蜚聲展綵春眠柳文思裁珠夜泣鮫  
師友淵源吾豈敢會看翡翠聳林梢

送劉明叟治鹽事還省

海上銀沙百鍊成年年飛騎走縱橫人傳一馬二童至  
春在十洲三島生烏帽多情簪菊蕊瑶琴有意送潮聲  
經綸滿腹須時用早上囊封致太平

次韻荅西山道士逢原

招提遠在岩堯上曾有耆龐說法來瀧瀧玉泉澄戒鉢

團團翠柏護經臺平疇隔水橫棋局遠嶂飛空擲酒盃  
聞道幽人經論罷支頤掩息獨徘徊

送章仲和教授之官池陽

亭亭秋浦玉芙蓉無限樓臺落照中定見揮毫題妙句  
更須拄笏繼高風當年故壘遺金鏃此日清溪漾碧筒  
人世機心何日了持觴為酌九華公

梅隱齋

萬藥疎明鐵石堅肯同餘卉鬪芳妍青雲覆幕水承柱

白玉為堂雪作瓊橘叟不知身外事壺公唯識洞中天  
何人欲問調羹法一榻蒙頭謝醉眠

次韻鄭景尹重九四首

年年京國度重陽禁路風高徹骨涼坐覺衣寬藏宿土  
行疑靴冷怯新霜紫萸曾憶童時佩黃菊須看歲晚香  
惆悵東山在何許挑燈無寐坐方牀

無復金莢與覆韉屢看秋月缺還圓風塵自覺真衰矣  
勲業深思盍舍旃烏帽塵荒憐遠客白衣酒熟慰癯仙

深慙涉世脂韋久強項何能效董宣

還家兩歲見重陽過雁橫空拂曉涼尚憶傾心朝午日  
欲將勁節拒朝霜禽魚有樂隨天性蜂蝶無知戀晚香  
從此林間端見一不妨枕易睡匡牀

久矣懸車撤坐羈天機渾沌黜方圓披沙經窟知非矣  
秉燭書床尚勉旃愧我詞華端近俗愛君詩律已通僊  
門前種菊高如許亦欲紛披五采宣

齊前海棠秋日著數花瓘首賦詩次韻

四山紅葉報秋殘  
駐目家林認未端  
螢點流星驚乍曉  
鳳銜初日怯輕寒  
鮮鮮敏手攢新錦  
炯炯芳心吐故丹  
西帝已能回藻景  
為言莫作杏花看

金祇當御衆芳殘  
忽見奇葩表樹端  
霞臉已拚千日醉  
絳唇自怯五更寒  
燈籠錦就霞衣帔  
箭鏃砂成寶鼎丹  
致此淒清端慰藉  
停杯擬作百回看

次韻吳門聲上人

翠樾經院多高人

景德寺有翠樾方丈

碧窗點翰五采新  
天機不

受梁燕語逸興直與江鷗親羨君解衣浣流水愧我束帶陪禁宸屈指當今人物論從此有約同垂綸

至人天隱樂有餘良玉不願為雕璣昂昂盤石大坐相杳杳歸雁旁行書白蓮解結碧雲座綠蕉不羨青蔥裾道人繙經悟空假始信塵世非真如

憶雙溪

清溪明處水交流萬井鱗鱗冠蓋稠盃凝玉光明月入幕遮翠影落花留雲生古洞千山雨風送層樓萬壑秋

麗澤祠前最佳絕藕花零亂勝滄洲

寄張希孟內翰

君方習隱食蒼柏我亦採真歌白蘋千嶂遶樓堪岸幘  
百泉當戶足垂綸蓴鱸水濶滄洲晚稻蠡田肥澤國春  
日夕相思看過雁客來無惜寄書頻

清容居士集卷十二